

**PRAVILNIK O UPRAVLJANJU
INTELEKTUALNIM VLASNIŠTVOM
UNIVERZITETA U SARAJEVU**

UNIVERZITET U SARAJEVU

**PRAVILNIK O UPRAVLJANJU INTELEKTUALNIM VLASNIŠTVOM
UNIVERZITETA U SARAJEVU**

Sarajevo, maj 2022. godine

SADRŽAJ

DIO I- OPŠTE ODREDBE.....	4
DIO II - PRAVA NA INTELEKTUALNIM DOBRIMA.....	6
DIO III - KOMISIJA ZA INTELEKTUALNO VLASNIŠTVO I URED ZA UPRAVLJANJE INTELEKTUALNIM VLASNIŠTVOM.....	10
DIO IV - PRIJAVA, PROCJENA I KOMERCIJALIZACIJA INTELEKTUALNIH DOBARA.....	12
DIO V - PRELAZNE I ZAVRŠNE ODREDBE.....	15

Na osnovu člana 130. Zakona o visokom obrazovanju Kantona Sarajevo ("Službene novine Kantona Sarajevo", br. 33/17, 35/20, 40/20 i 39/21) i člana 59. Statuta Univerziteta u Sarajevu, Senat Univerziteta u Sarajevu je na 47. redovnoj sjednici održanoj 25. 05. 2022. godine, d o n i o

PRAVILNIK O UPRAVLJANJU INTELEKTUALNIM VLASNIŠTVOM UNIVERZITETA U SARAJEVU

DIO I- OPŠTE ODREDBE

Član 1.

(Predmet Pravilnika)

- (1) Ovim pravilnikom se uređuju: prava na intelektualnim dobrima nastalim u okviru Univerziteta u Sarajevu i organizacionih jedinica (dalje u tekstu: Univerzitet), međusobni odnosi između Univerziteta i stvaralaca intelektualnih dobara, te trećih fizičkih i pravnih lica u pogledu prijave, procjene, pravne zaštite i komercijalizacije intelektualnih dobara, te osnivanje, sastav, način rada i nadležnosti Komisije za intelektualno vlasništvo i Ureda za upravljanje intelektualnim vlasništvom.
- (2) Ovaj Pravilnik se primjenjuje na intelektualna dobra nastala kao rezultat naučnoistraživačkog i umjetničkoistraživačkog, te stručnog i drugog rada na Univerzitetu i njegovim organizacionim jedinicama, prilikom kojeg su u značajnoj ili isključivoj mjeri korištena sredstva Univerziteta, koja uključuju, ali se ne ograničavaju na opremu, radni prostor, naučnoistraživačke i umjetničkoistraživačke resurse (biblioteke, baze podataka, laboratorije, ljudski, vremenski i novčani resursi i sl.), uključujući posebno ona intelektualna dobra, koje su nastale na radu, u vezi s radom, prema uputstvima poslodavca i/ili u okviru naučnoistraživačkih ili umjetničkoistraživačkih projekata, koja samostalno realiziraju na Univerzitetu.
- (3) Pod intelektualnim dobrima iz st. (1) i (2) ovog člana se podrazumijevaju rezultati intelektualnog rada u bilo kojoj oblasti Univerziteta, koji uživaju ili mogu uživati zaštitu u skladu s pozitivnim propisima, koji uređuju oblast intelektualnog vlasništva u Bosni i Hercegovini ili koji su od značaja za korištenje takvih intelektualnih dobara i koji uključuju:
 - a) računarske programe i baze podataka koje mogu biti zaštićene autorskim pravom;
 - b) baze podataka, videograme i fonograme koji mogu biti zaštićeni pravima srodnim autorskom pravu;
 - c) pronalaskе, koji mogu biti zaštićeni patentom ili konsenzualnim patentom;
 - d) vanjski izgled (dizajn) proizvoda koji može biti zaštićen pravom na industrijski dizajn;
 - e) topografije, koje mogu biti zaštićene pravom na zaštitu topografije integrisanog kola;
 - f) oznake, koje mogu biti zaštićene pravom žiga;
 - g) sorte biljaka, koje mogu biti zaštićene oplemenjivačkim pravom;
 - h) know-how.

- (4) Ovaj Pravilnik se primjenjuje na intelektualna dobra nastala u okviru Univerziteta nakon stupanja na snagu ovog Pravilnika, kao i na intelektualna dobra čija realizacija je započela prije tog momenta, ali je okončana u periodu nakon stupanja na snagu Pravilnika.
- (5) Ovaj pravilnik se primjenjuje na:
- a) akademsko i naučnoistraživačko osoblje i ostale zaposlenike Univerziteta za vrijeme trajanja njihovog zaposlenja na Univerzitetu, kao i po prestanku njihovog zaposlenja, ukoliko su intelektualna dobra nastala za vrijeme njihovog zaposlenja na Univerzitetu;
 - b) studente Univerziteta;
 - c) gostujuće studente Univerziteta;
 - d) gostujuće profesore i istraživače na Univerzitetu;
 - e) lica, koja su po osnovu ugovora angažovana od strane Univerziteta.
- (6) Sva lica iz st. (5) ovog člana su dužna da primjenjuju i poštuju odredbe ovog Pravilnika u odnosima i komunikaciji sa trećim pravnim i fizičkim licima u pogledu otkrivanja, pravne zaštite ili komercijalizacije intelektualnih dobara iz st. (3) ovog člana.

Član 2.

(Značenje izraza)

U smislu ovog Pravilnika, a u skladu sa relevantnom zakonskom regulativom u oblasti intelektualnog vlasništva, navedeni izrazi imaju sljedeća značenja:

- a) Stvaralac: Svako lice, uključujući, ali se ne ograničava na autore, pronalazače, dizajnere itd. koje je stvorilo određeno intelektualno dobro.
- b) Intelektualno vlasništvo: Svi rezultati intelektualnog rada, koji uživaju ili mogu uživati zaštitu u skladu s pozitivnim propisima, koji uređuju oblast intelektualnog vlasništva u BiH.
- c) Autorsko pravo: Pravo kojim se štite individualne duhovne tvorevine iz oblasti književnosti, nauke i umjetnosti ili drugog oblika stvaralaštva, bez obzira na način i oblik izražavanja (npr. računarski programi i baze podataka).
- d) Prava srodna autorskom pravu: Prava filmskih producenata, proizvođača fonograma i baza podataka.
- e) Patent: Pravo kojim se štiti novo rješenje određenog tehničkog problema, koje se materijalizuje u pronalasku.
- f) Konsenzualni patent: Patent skraćenog trajanja, koji se priznaje bez suštinskog ispitivanja patentne prijave.
- g) Industrijski dizajn: Pravo kojim se štiti trodimenzionalni ili dvodimenzionalni vanjski izgled cijelog proizvoda, ili njegovog dijela, koji je određen njegovim vizuelnim karakteristikama, posebno linijama, konturama, bojama, oblikom, teksturom i/ili materijalima od kojih je proizvod sačinjen, ili kojima je ukrašen, kao i njihovom kombinacijom.
- h) Pravo topografije integrisanog kola: Pravo kojim se štiti skup povezanih slika, zabilježenih ili kodiranih na bilo koji način, koje predstavljaju trodimenzionalnu matricu slojeva od kojih je integrirano kolo sastavljeno, pri čemu svaka slika sadrži cjelinu ili dio matrice poluprovodničkog proizvoda u svakoj fazi njegove proizvodnje (topografija).
- i) Oplemenjivačko pravo: Pravo kojim se štiti grupa bilja unutar najniže botaničke sistematske jedinice, koju je, bez obzira na to da li ispunjava druge uslove za zaštitu, moguće okarakterizirati po osobinama koje potiču iz određenog genotipa ili kombinacije genotipova, razlikovati od bilo

koje druge grupe biljaka barem po jednoj od navedenih osobina, te smatrati sistematskom jedinicom ako se te osobine u toku razmnožavanja ne mijenjaju (nova biljna sorta);

- j) Poslovna tajna: Informacija za koju je očito da bi prouzrokovala ekonomsku ili drugu štetu interesima Univerziteta ako dođu u posjed trećeg lica bez saglasnosti Univerziteta, a koja je povezana sa nekim od intelektualnih dobara ili prava intelektualnog vlasništva prema odredbama ovog Pravilnika.
- k) Know-how: Svaki oblik tehničke informacije, praktičnog znanja, tehnike ili vještine, koji je u vezi sa proizvodnim ili postizanjem određenog rezultata, a koje može, ali ne mora biti povezana sa nekim od prava intelektualnog vlasništva.
- l) Prethodno intelektualno vlasništvo: Bilo koje postojeće intelektualno vlasništvo, koje je pripada licima na koje se primjenjuje ovaj Pravilnik, a koje je nastalo prije početka njegove primjene na iste.
- m) Žig: Pravo kojim se štiti oznaka koje se može grafički prikazati i koja je podobna za razlikovanje.

DIO II - PRAVA NA INTELEKTUALNIM DOBRIMA

Član 3.

(Prava na intelektualnim dobrima)

Univerzitet je u pravilu nosilac prava intelektualnog vlasništva ili ima pravo prečeg sticanja prava intelektualnog vlasništva nad intelektualnim dobrima stvorenim od strane lica iz čl. 1, st. (5) u skladu s uslovima iz čl. 1, st. (2) ovog Pravilnika i ima isključivo i neograničeno pravo njihovog iskorištavanja, ukoliko odredbama ovog Pravilnika nije uređeno drugačije.

Član 4.

(Pronalasci)

- (1) Ukoliko je pronalazak realizovan na Univerzitetu u skladu s čl. 1, st. (2) ovog Pravilnika, lica iz čl. 1, st. (5) Pravilnika dužna su u roku 30 dana pismeno obavijestiti Ured za upravljanje intelektualnim vlasništvom o tom pronalasku, čuvati podatke o pronalasku kao poslovnu tajnu i dalje postupiti u skladu s čl. 15 Pravilnika.
- (2) Pravo na sticanje patentne zaštite i komercijalizaciju pronalaska iz st. (1) ovog člana pripadaju isključivo i neograničeno Univerzitetu. Licima iz čl. 1, st. (5) Pravilnika pripada udio u dobiti od komercijalizacije, ukoliko ona bude ostvarena, u skladu s čl. 18, st. (4) Pravilnika.
- (3) Ukoliko je pronalazak stvoren samo uzgrednom upotrebom naučnoistraživačkih ili umjetničkoistraživačkih resursa Univerziteta i/ili nije stvoren na radu ili u vezi s radom, ali u vezi sa djelatnošću Univerziteta, lica iz čl. 1, st. 5 Pravilnika dužna su o tom pronalasku pismeno obavijestiti Ured za upravljanje intelektualnim vlasništvom i ponuditi Univerzitetu ustupanje prava na njemu (pravo prečeg sticanja prava intelektualnog vlasništva), čuvati podatke o pronalasku kao poslovnu tajnu i dalje postupiti u skladu sa čl. 15 Pravilnika.
- (4) Ukoliko Univerzitet odluči da će koristiti pravo prečeg sticanja prava intelektualnog vlasništva iz st. 3 ovog člana, pravo na sticanje patentne zaštite i komercijalizaciju pronalaska pripadaju isključivo i neograničeno Univerzitetu. Licima iz čl. 1, st. (5) Pravilnika pripada udio u dobiti od komercijalizacije, ukoliko ona bude ostvarena, u skladu s čl. 18, st. (4) Pravilnika.

- (5) Ukoliko Univerzitet odluči da neće koristiti pravo prečeg sticanja prava intelektualnog vlasništva iz st. 3 ovog člana, pravo na sticanje patentne zaštite i komercijalizaciju pronalaska pripadaju isključivo i neograničeno pronalazaču.
- (6) Ukoliko Univerzitet odluči da će samo jednim udjelom koristiti pravo prečeg sticanja prava intelektualnog vlasništva iz st. (3) ovog člana, pitanje prava na sticanje patentne zaštite i komercijalizaciju pronalaska uređuju se ugovorom između pronalazača i Univerziteta shodnom primjenom čl. 16, st. (7) Pravilnika. Licima iz čl. 1, st. (5) Pravilnika pripada udio u dobiti od komercijalizacije, ukoliko ona bude ostvarena, u skladu sa čl. 18, st. (4) Pravilnika.
- (7) Ukoliko je pronalazak stvoren u okviru naučnoistraživačkog ili umjetničkoistraživačkog projekta, koji se realizira u korist naručioca, koji je treće lice (javno ili privatno finansirana istraživanja), na pitanje sticanja, korištenja i komercijalizacije prava intelektualnog vlasništva se primjenjuju odredbe ugovora između naručioca i izvršioca istraživanja.
- (8) Odredbe st. (7) ovog člana se shodno primjenjuju i na lica iz čl. (1), st. (5) c) i d) Pravilnika u slučaju ugovora o učenju (Learning Agreement) ili ugovora o istraživačkim i/ili predavačkim stipendijama. Lica iz čl. 1, st. (5) c) i d) Pravilnika obavezna su da prijave Uredu za upravljanje intelektualnim vlasništvom eventualno Prethodno intelektualno vlasništvo.
- (9) Univerzitet priznaje i poštuje neotuđiva moralna prava pronalazača na pronalascima iz ovog člana.

Član 5.

(Predmeti zaštite industrijskog dizajna)

Odredbe čl. (4) Pravilnika se shodno primjenjuju i na intelektualna dobra, koja se mogu zaštititi pravom industrijskog dizajna.

Član 6.

(Autorska djela)

- (1) Ukoliko je računarski program i/ili originalna baza podataka stvorena na Univerzitetu u skladu s čl. 1, st. (2) Pravilnika, lica iz čl. 1, st. (5) Pravilnika dužna su u roku od 30 dana pismeno obavijestiti Ured za upravljanje intelektualnim vlasništvom o tim autorskim djelima, čuvati podatke o njima kao poslovnu tajnu i dalje postupiti u skladu sa čl. 15 Pravilnika.
- (2) Sva autorska imovinska prava na računarskom programu, kao i bazi podataka iz st. (1) ovog člana pripadaju za cijelo vrijeme trajanja autorskog prava isključivo i neograničeno Univerzitetu. Licima iz čl. 1, st. (5) Pravilnika pripada udio u dobiti od komercijalizacije, ukoliko ona bude ostvarena, u skladu s čl. 18, st. (4) Pravilnika.
- (3) Ukoliko su autorska djela iz st. (1) ovog člana stvorena u okviru naučnoistraživačkog ili umjetničkoistraživačkog projekta, koji se realizira u korist naručioca, koji je treće lice (javno ili privatno finansirana istraživanja), na pitanje sticanja, korištenja i komercijalizacije prava intelektualnog vlasništva se primjenjuju odredbe ugovora između naručioca i izvršioca istraživanja.
- (4) Odredbe st. (3) ovog člana se shodno primjenjuju i na lica iz čl. 1, st. (5) c) i d) u slučaju ugovora o učenju (Learning Agreement) ili ugovora o istraživačkim i/ili predavačkim stipendijama. Lica iz čl. 1, st. (5) c) i d) Pravilnika obavezna su da prijave Uredu za upravljanje intelektualnim vlasništvom eventualno Prethodno intelektualno vlasništvo.
- (5) Univerzitet priznaje i poštuje neotuđiva moralna prava autora na autorskim djelima iz ovog člana.

Član 7.

(Predmeti zaštite pravima srodnim autorskom pravu)

- (1) Ukoliko su baza podataka, videogram ili fonogram stvoreni na Univerzitetu u skladu s čl. 1, st. (2) Pravilnika, lica iz čl. 1, st. (5) Pravilnika dužna su u roku od 30 dana pismeno obavijestiti Ured za upravljanje intelektualnim vlasništvom o tim predmetima zaštite srodnih prava, čuvati podatke o njima kao poslovnu tajnu i dalje postupiti u skladu sa čl. 15 Pravilnika.
- (2) Sva srodna prava na bazi podataka, videogramu ili fonogramu iz st. (1) ovog člana pripadaju na period od 5 godina od podnošenja Prijave isključivo i neograničeno Univerzitetu. Licima iz čl. 1, st. (5) Pravilnika pripada udio u dobiti od komercijalizacije, ukoliko ona bude ostvarena, u skladu sa čl. 18, st. (4) Pravilnika.
- (3) Nakon isteka roka od pet godina, prava Univerziteta prestaju tako što se vraćaju licima iz čl. 1 st. (5) Pravilnika, osim ako Univerzitet prije isteka tog roka ne zatraži njihov ponovni isključivi prijenos bez ograničenja. U tom slučaju licima iz čl. 1 st. (5) Pravilnika pripada pravo na odgovarajuću naknadu za ponovni prenos prava na bazi podataka, videogramu ili fonogramu, koja će biti utvrđena ugovorom između tih lica i Univerziteta shodnom primjenom čl. 16 st. (7) Pravilnika i udio u dobiti od komercijalizacije, ukoliko ona bude ostvarena, u skladu sa čl. 18, st. (4) Pravilnika.
- (4) Ukoliko su predmeti zaštite srodnih prava iz st. (1) ovo člana stvoreni u okviru naučnoistraživačkog ili umjetničkoistraživačkog projekta, koji se realizira u korist naručioca, koji je treće lice (javno ili privatno finansirana istraživanja), na pitanje sticanja, korištenja i komercijalizacije prava intelektualnog vlasništva se primjenjuju odredbe ugovora između naručioca i izvršioca istraživanja.
- (5) Odredbe st. 6 ovog člana se shodno primjenjuju i na lica iz čl. 1, st. (5) c) i d) u slučaju ugovora o učenju (Learning Agreement) ili ugovora o istraživačkim i/ili predavačkim stipendijama. Lica iz čl. 1, st. (5) c) i d) Pravilnika obavezna su da prijave Uredu za upravljanje intelektualnim vlasništvom eventualno Prethodno intelektualno vlasništvo.

Član 8.

(Biljne sorte)

- (1) Ukoliko je biljna sorta stvorena na Univerzitetu u skladu sa čl. 1, st. (2) Pravilnika, lica iz čl. 1, st. (5) Pravilnika dužna su u roku od 30 dana pismeno obavijestiti Ured za upravljanje intelektualnim vlasništvom o tom pronalasku, čuvati podatke o biljnoj sorti kao poslovnu tajnu i dalje postupiti u skladu sa čl. 15 Pravilnika.
- (1) Pravo na sticanje oplemenjivačkog prava i komercijalizaciju biljne sorte iz st. (1) ovog člana pripadaju isključivo i neograničeno Univerzitetu. Licima iz čl. 1, st. (5) Pravilnika pripada udio u dobiti od komercijalizacije, ukoliko ona bude ostvarena, u skladu sa čl. 18, st. (4) Pravilnika.
- (2) Ukoliko je biljna sorta stvorena u okviru naučnoistraživačkog projekta, koji se realizira u korist naručioca, koji je treće lice (javno ili privatno finansirana istraživanja), na pitanje sticanja, korištenja i komercijalizacije prava intelektualnog vlasništva se primjenjuju odredbe ugovora između naručioca i izvršioca istraživanja.
- (3) Odredbe st. 3 ovog člana se shodno primjenjuju i na lica iz čl. 1, st. (5) c) i d) u slučaju ugovora o učenju (Learning Agreement) ili ugovora o istraživačkim i/ili predavačkim stipendijama. Lica iz čl. 1, st. (5) c) i d) Pravilnika obavezna su da prijave Uredu za upravljanje intelektualnim vlasništvom eventualno Prethodno intelektualno vlasništvo.
- (4) Univerzitet priznaje i poštuje neotuđiva moralna prava stvaraoca biljne sorte iz ovog člana..

Član 9.

(Topografija integrisanog kola)

- (1) Ukoliko je topografija stvorena na Univerzitetu u skladu sa čl. 1, st. (2) Pravilnika, lica iz čl. 1, st. (5) Pravilnika dužna su u roku od 30 dana pismeno obavijestiti Ured za upravljanje intelektualnim vlasništvom o toj topografiji, čuvati podatke o njoj kao poslovnu tajnu i dalje postupiti u skladu sa čl. 15 Pravilnika.
- (2) Pravo na sticanje zaštite i komercijalizaciju topografije iz st. (1) ovog člana pripadaju isključivo i neograničeno Univerzitetu. Licima iz čl. 1, st. (5) Pravilnika pripada udio u dobiti od komercijalizacije, ukoliko ona bude ostvarena, u skladu sa čl. 18, st. (4) Pravilnika.
- (3) Ukoliko je topografija stvorena u okviru naučnoistraživačkog ili umjetničkoistraživačkog projekta, koji se realizira u korist naručioca, koji je treće lice (javno ili privatno finansirana istraživanja), na pitanje sticanja, korištenja i komercijalizacije prava intelektualnog vlasništva se primjenjuju odredbe ugovora između naručioca i izvršioca istraživanja.
- (4) Odredbe st. (3) ovog člana se shodno primjenjuju i na lica iz čl. 1, st. (5) c) i d) Pravilnika u slučaju ugovora o učenju (Learning Agreement) ili ugovora o istraživačkim i/ili predavačkim stipendijama. Lica iz čl. 1, st. (5) c) i d) Pravilnika obavezna su da prijave Uredu za upravljanje intelektualnim vlasništvom eventualno Prethodno intelektualno vlasništvo.

Član 10.

(Žig)

Odredbe čl. (8) Pravilnika se shodno primjenjuju i na oznake koja se mogu zaštititi pravom žiga.

Član 11.

(Know-how)

- (1) Ukoliko je znanje i iskustvo (know-how) stvoreno na Univerzitetu u skladu sa čl. 1, st. (2) Pravilnika, a posebno ukoliko je ono vezano za korištenje pronalaska, biljne sorte ili nekog drugog intelektualnog dobra, koje može biti zaštićeno nekim od prava intelektualnog vlasništva u skladu sa odredbama ovog Pravilnika, lica iz čl. 1, st. (5) Pravilnika dužna su u roku od 30 dana pismeno obavijestiti Ured za upravljanje intelektualnim vlasništvom o tom know-how-u, čuvati podatke o njemu kao poslovnu tajnu i dalje postupiti u skladu sa čl. 15 Pravilnika.
- (2) Pravo na komercijalizaciju know-how-a iz st. (1) ovog člana pripadaj isključivo i neograničeno Univerzitetu. Licima iz čl. 1, st. (5) Pravilnika pripada udio u dobiti od komercijalizacije, ukoliko ona bude ostvarena, u skladu sa čl. 18 st. (4) Pravilnika.
- (3) Ukoliko je know-how stvoren u okviru naučnoistraživačkog ili umjetničkoistraživačkog projekta, koji se realizira u korist naručioca, koji je treće lice (javno ili privatno finansirana istraživanja), na pitanje njegovog korištenja i komercijalizacije se primjenjuju odredbe ugovora između naručioca i izvršioca istraživanja.
- (4) Odredbe st. (7) ovog člana se shodno primjenjuju i na lica iz čl. 1, st. (5) c) i d) Pravilnika u slučaju ugovora o učenju (Learning Agreement) ili ugovora o istraživačkim i/ili predavačkim stipendijama.

Član 12.

(Diplomski radovi, završni radovi i doktorske disertacije)

- (1) Neovisno od prethodnih odredbi Pravilnika, studenti Univerziteta su obavezni prenijeti na Univerzitet, bez naknade i vremenskog ograničenja, relevantna prava potrebna za online pohranjivanje i činjenje dostupnim javnosti njihovih diplomskih radova, završnih radova ili doktorskih disertacija.
- (2) Ukoliko intelektualno dobro definirano u čl. 5, 6, 7, 8, 9, 10 i 11 nastane u procesu realizacije diplomskog-završnog, magistarskog-završnog rada i doktorske disertacije u okviru organizacionih jedinica Univerziteta, pravo na komercijalizaciju pripadaju isključivo i neograničeno Univerzitetu.
- (3) Studenti dokorskog studija čija doktorska disertacija rezultira potencijalnim patentom ili nekim drugim intelektualnim dobrom, oslobođeni su objavljivanja obaveznih naučnih radova ukoliko je patentna prijava uredno zaprimljena od strane nadležnog patentnog tijela.
- (4) Raspodjela dobiti od komercijalizacije patenta ili intelektualnog dobra nastalog realizacijom doktorske disertacije vrše se u skladu sa čl. 18, st. 4. ovog Pravilnika.

DIO III - KOMISIJA ZA INTELEKTUALNO VLASNIŠTVO I URED ZA UPRAVLJANJE INTELEKTUALNIM VLASNIŠTVOM

Član 13.

(Komisije za intelektualno vlasništvo)

- (1) Komisija za intelektualno vlasništvo (dalje u tekstu: Komisija) je stručno i savjetodavno tijelo u oblasti upravljanja intelektualnim vlasništvom nastalim u okviru Univerziteta, koje osniva i čije članove na prijedlog Rektora imenuje Senat Univerziteta.
- (2) Komisiju čini sedam članova, koji raspoložu ekspertizom u području zaštite intelektualnog vlasništva i čiji mandat traje četiri godine.
- (3) Komisija radi u sjednicama, koje se održavaju redovno, minimalno dva puta godišnje, i vanredno, te na zahtjev Ureda za upravljanje intelektualnim vlasništvom Univerziteta sa ciljem izdavanja Mišljenja o opravdanosti zaštite i/ili komercijalizacije intelektualnih dobara.
- (4) Komisija donosi odluke većinom ukupnog broja članova.
- (5) Nadležnosti Komisije su sljedeće:
 - a) nadzor nad radom i pružanje strateških smjernica Uredu za upravljanje intelektualnim vlasništvom;
 - b) utvrđivanje prijedloga odluke o razvoju i određivanju strategije upravljanja i komercijalizacije intelektualnog vlasništva, koju usvaja Senat Univerziteta;
 - c) praćenje realizacije aktivnosti zaštite intelektualnih dobara i njihove komercijalizacije;
 - d) davanje Mišljenja o opravdanosti zaštite i/ili komercijalizacije intelektualnih dobara;
 - e) pokretanje inicijative o osnivanju privrednih društava od strane Univerziteta (spin-off, spin-out ili start-up) u cilju komercijalizacije intelektualnih dobara prema odredbama ovog Pravilnika;
 - f) usvajanje Poslovnika o radu Komisije;
 - g) nadgledanje implementacije i razvoja Politike upravljanja intelektualnim vlasništvom na Univerzitetu;
 - h) utvrđivanje prijedloga izmjena i dopuna Pravilnika;

- i) podnošenje Senatu Univerziteta izvještaja o svom radu jednom godišnje;
 - j) vršenje drugih zadataka u skladu s odlukama Senata Univerziteta.
- (6) Prethodno imenovanju, članovi Komisije potpisuju Izjavu o povjerljivosti, čuvanju i zaštiti integriteta intelektualnog vlasništva Univerziteta.

Član 14.

(Ured za upravljanje intelektualnim vlasništvom)

- (1) Ured za upravljanje intelektualnim vlasništvom (dalje u tekstu: Ured) je stalno stručno i administrativno tijelo, koje se uspostavlja odlukom Senata i čija je svrha da pruži podršku licima iz čl. 1 st. 5 ovog Pravilnika u pogledu identifikacije, zaštite, upravljanja i komercijalizacije intelektualnih dobara, prema odredbama ovog Pravilnika, a koji mogu uživati zaštitu po osnovu nekog od prava intelektualnog vlasništva.
- (2) Uredom upravlja rukovodilac, a za svoj rad odgovoran je Direktor Centru za istraživanje i razvoj.
- (3) Godišnji Izvještaj o radu Ureda podnosi se Rektor Univerziteta putem Centra za istraživanje i razvoj Univerziteta.
- (4) Nadležnosti Ureda su sljedeće:
 - a) pružanje stručne, konsultativne i administrativne podrške licima iz čl. 1 st. 5 ovog Pravilnika u pogledu identifikacije, pravne zaštite i komercijalizacije intelektualnih dobara prema odredbama ovog Pravilnika;
 - b) priprema i stručno-tehnička podrška u izradi Prijave intelektualnog dobra (dalje u tekstu: Prijava);
 - c) priprema Izvještaja o procjeni, koji podnosi Komisiji, uz zahtjev za izdavanje Mišljenja o opravdanosti zaštite i/ili komercijalizacije intelektualnih dobara;
 - d) provođenje postupka zaštite intelektualnih dobara pravima intelektualnog vlasništva prema ovom Pravilniku u skladu s relevantnim zakonskim propisima;
 - e) podsticanje, podrška i realizacija različitih vidova transfera intelektualnih dobara i između Univerziteta i privrede, odnosno društvene zajednice;
 - f) edukacija i stručno-tehnička podrška akademskom i naučnoistraživačkom osoblju u postupcima zaštite intelektualnog vlasništva;
 - g) izrada stručnih mišljenja, te tehnoloških i ekonomskih studija izvodljivosti, kako u pogledu intelektualnih dobara prema odredbama ovog Pravilnika, tako i za potrebe privrede i društvene zajednice;
 - h) upravljanje intelektualnim vlasništvom;
 - i) upravljanje ugovorima o prenosu i iskorištavanju intelektualnih dobara, te vođenje drugih poslova u postupku komercijalizacije intelektualnih dobara prema ovom Pravilniku;
 - j) upravljanje troškovima vezanim za zaštitu i komercijalizaciju intelektualnih dobara prema odredbama ovog Pravilnika;
 - k) upravljanje distribucijom prihoda i dobiti, stečenih po osnovu iskorištavanja intelektualnih dobara prema ovom Pravilniku;
 - l) donošenje Poslovnika o radu Ureda i forme i sadržaja obrazaca i ugovora vezanih za identifikaciju i komercijalizaciju intelektualnih dobara prema ovom Pravilniku;
 - m) podizanje nivoa svijesti i znanja na Univerzitetu o intelektualnim dobrima i potrebi, te načinima njihove zaštite pravima intelektualnog vlasništva;

- n) vođenje registra prijava intelektualnih dobara i drugih evidencija, vezanih za zaštitu i komercijalizaciju intelektualnih dobara;
- o) vođenje registra/liste eksperata za intelektualno vlasništvo;
- p) obavljanje drugih poslova vezanih uz Prijavu, procjenu, pravnu zaštitu i komercijalizaciju intelektualnih dobara, te druge poslove na zahtjev Komisije.

DIO IV - PRIJAVA, PROCJENA I KOMERCIJALIZACIJA INTELEKTUALNIH DOBARA

Član 15.

(Prijava intelektualnog dobra)

- (1) Stvaralac intelektualnog dobra prema odredbama ovog Pravilnika dužan je u roku od 30 dana od njegovog nastanka podnijeti Uredu Prijavu intelektualnog dobra (dalje u tekstu: *Prijava*), u kojoj su sadržane sve neophodne informacije vezane za njega i okolnosti njegovog nastanka, te dostavljena prateća dokumentacija.
- (2) Ukoliko intelektualno dobro ne bude dovoljno opisano/otkriveno u *Prijavi*, odnosno u slučaju nedostajuće dokumentacije, Ured podnosiocu *Prijave* može odrediti dodatni rok od 30 dana za dopunu. Ukoliko podnosilac *Prijave* ni u dodatnom roku ne bude dostavio sve relevantne podatke, Ured će odbiti *Prijavu*.
- (3) Ured, uz saglasnost Komisije, može odbiti *Prijavu* i ukoliko *prima facie* utvrdi, da predmet *Prijave* nije intelektualno dobro na koje se primjenjuju odredbe ovog Pravilnika, odnosno, koje ne može uživati zaštitu po osnovu nekog prava intelektualnog vlasništva u skladu s pozitivnim zakonskim propisima u Bosni i Hercegovini.
- (4) U svakom momentu od podnošenja *Prijave*, Ured može zahtijevati od podnosioca da stavi na raspolaganje dodatne informacije ili dokumentaciju u cilju sadržajnog ispitivanja *Prijave* u pogledu mogućnosti pravne zaštite i komercijalizacije predmetnog intelektualnog dobra.
- (5) Formu i detaljan sadržaj obrasca *Prijave* utvrđuje Ured.

Član 16.

(Procjena intelektualnog dobra)

- (1) U roku od 30 dana, od dana prijema uredne i potpune *Prijave* iz čl. 15 ovog Pravilnika, Ured vrši procjenu mogućnosti pravne zaštite i komercijalne upotrebe prijavljenog intelektualnog dobra i o tome sastavlja Izvještaj o procjeni (dalje u tekstu: *Izvještaj*), koji podnosi Komisiji uz zahtjev za izdavanje Mišljenja o opravdanosti zaštite i/ili komercijalizacije intelektualnih dobara (dalje u tekstu: *Mišljenje*).
- (2) Rok iz st. (1) ovog člana se može produžiti na najviše 30 dana, ukoliko to zahtijeva kompleksnost *Prijave* konkretnog intelektualnog dobra. O produženju roka odlučuje Komisija, na pismeni zahtjev Ureda, koji se podnosi najkasnije 7 dana prije isteka roka iz st. (1) ovog člana.
- (3) *Izvještaj* iz st. (1) ovog člana sadrži naročito informacije o:
 - a) opravdanosti pokretanja postupka pravne zaštite intelektualnog dobra nekim od prava intelektualnog vlasništva u BiH i/ili inostranstvu i oblik pravne zaštite (npr. patent ili konsenzualni patent, industrijski dizajn, nova biljna sorta itd.), koji bi se trebao primijeniti;
 - b) procjeni troškova postupka pravne zaštite za konkretno intelektualno dobro;
 - c) utemeljenom prijedlogu, da li u slučaju prava prečeg sticanja prava intelektualnog vlasništva, Univerzitet treba da stekne prava intelektualnog vlasništva na konkretnom intelektualnom

- dobru samostalno ili zajedno sa stvaraocem intelektualnog dobra, licem iz čl. 4 st. (6) ovog Pravilnika i u kojim omjerima;
- d) utemeljenom prijedlogu, da li da Univerziteta snosi troškove pravne zaštite intelektualnog dobra samostalno ili zajedno sa stvaraocem intelektualnog dobra, licem iz čl. 4 st. (6) ovog Pravilnika i/ili je potrebno da se pronađu drugi izvori finansiranja i ako da, koji;
 - e) utemeljenom prijedlogu, da li Univerzitet treba da vodi postupak sticanja zaštite nekim od prava intelektualnog vlasništva samostalno ili zajedno sa stvaraocem intelektualnog dobra, licem iz čl. 4 st. (6) ovog Pravilnika;
 - f) inicijalnoj procjeni komercijalne vrijednosti intelektualnog dobra, koje je predmet Prijave i potencijalnog prihoda i dobiti, koji se mogu ostvariti komercijalizacijom tog dobra;
 - g) prijedlogu o tome, ko će voditi postupak komercijalizacije intelektualnog dobra (Univerzitet putem Ureda ili stvaralac, lice iz čl. 4 st. (6) ovog Pravilnika samostalno) i ko će snositi troškove komercijalizacije;
 - h) prijedlogu o metodama komercijalizacije konkretnog intelektualnog dobra (npr. osnivanje spin off-a, start up-a ili spin out društava, zaključenje ugovora o licenci ili na neki drugi način);
 - i) inicijalnom prijedlogu o potencijalnim partnerima iz privrede i društvene zajednice u postupku komercijalizacije konkretnog intelektualnog dobra;
- (4) U roku od 30 dana, od dana dostave Izvještaja, Komisija daje Mišljenja, koje dostavlja Rektor na postupanje.
- (5) Ukoliko Mišljenje Komisije u pogledu zaštite i komercijalnog iskorištavanja intelektualnog dobra u korist Univerziteta bude negativno, stvaralac intelektualnog dobra može potpuno slobodno raspolagati s njim. Troškove postupka Prijave i procjene intelektualnog dobra snosi Univerzitet.
- (6) U slučaju iz st. (5) ovog člana, Univerzitet i dalje ima obavezu čuvanja podataka o intelektualnom dobru kao poslovne tajne, u skladu sa čl. 20 ovog Pravilnika.
- (7) Ukoliko Mišljenje Komisije i odluka Senata u pogledu zaštite i komercijalnog iskorištavanja intelektualnog dobra budu pozitivne, stvaralac intelektualnog dobra i Univerzitet zaključuju poseban ugovor, kojim su detaljno uređena sva pitanja, te prava i obaveze vezana za postupak sticanja pravne zaštite i komercijalizacije konkretnog intelektualnog dobra.

Član 17.

(Komercijalizacija intelektualnog dobra)

- (1) Komercijalizacija intelektualnih dobara i intelektualnog vlasništva na njima prema odredbama ovog Pravilnika podrazumijeva sticanje prihoda njihovim ekonomskim iskorištavanjem, naročito u smislu zaključenja ugovora o licenci/ugovora o transferu tehnologija, autorskih ugovora, ugovora o prijenosu prava, osnivanja novih privrednih društava (spin-off, start-up, spin-out i dr.) i sl. Postupkom komercijalizacije upravlja Ured u saradnji sa organizacionom jedinicom.
- (2) Postupku komercijalizacije svakog individualnog intelektualnog dobra/prava intelektualnog vlasništva moraju naročito prethoditi izrada plana komercijalizacije, finansijskog, marketinškog i poslovnog plana, te analiza rizika, te biti preduzete druge mjere od strane Ureda u cilju sticanja uvida u potrebe privrede (npr. izrada prototipa i modela, konsultacije sa interesnim grupacijama i sl.) i/ili društvene zajednice.
- (3) U toku postupka pravne zaštite i komercijalizacije intelektualnih dobara, koja su predmet Prijave, Univerzitet može odustati od daljnjeg postupanja i raskinuti ugovor iz čl. 16, st. (7) ovog Pravilnika, ukoliko utvrdi da je daljnje postupanje iz ekonomskih ili drugih razloga neisplativo ili neopravdano. U tom slučaju, na odgovarajući način se primjenjuje se čl. 16, st. (5). ovog Pravilnika.

- (4) Formu i sadržaj obrazaca ugovora za komercijalizaciju intelektualnih dobara/intelektualnog vlasništva će utvrditi Ured.
- (5) U slučaju osnivanja novih privrednih društava (spin-off, start-up, spin-out i dr.) udjeli u društvu i druga pitanja se određuju osnivačkim aktom društva.

Član 18.

(Prihodi i raspodjela dobiti)

- (1) Prihod od komercijalizacije intelektualnih dobara/intelektualnog vlasništva, u smislu ovog Pravilnika, čine svi iznosi ostvareni u vezi s njihovom komercijalizacijom u skladu s čl. 17 ovog Pravilnika.
- (2) Dobit, u smislu ovog Pravilnika, čini prihod iz st. (1) ovog člana umanjen za:
- a) sve troškove nastale u vezi s postupcima zaštite intelektualnih dobara (npr. troškovi taksi, troškovi zastupanja, troškovi stručnog savjetovanja, troškovi prijevoda i sl.);
 - b) sve troškove nastale u vezi s komercijalizacijom intelektualnih dobara/intelektualnog vlasništva (npr. notarski troškovi, konsultantski troškovi, troškovi osnivanja privrednog društva i sl.)
 - c) sva poreska i druga slična davanja u skladu sa pozitivnim zakonskim propisima;
 - d) administrativne i ostale troškove Ureda u fiksnom iznosu od 5% od ukupnog prihoda.
- (3) Raspodjela dobiti od komercijalizacije intelektualnih dobara/prava intelektualnog vlasništva zavisi od toga, kome i u kojim udjelima pripada pravo intelektualnog vlasništva na tom dobru, o kojoj kategoriji prava intelektualnog vlasništva se radi, ko snosi finansijski teret zaštite i/ili komercijalizacije, koji broj lica je učestvovao u stvaranju tog intelektualnog dobra, te od sadržaja Ugovora iz čl. 16, st. (7) i sadržaja akta iz čl. 17 st. (5) ovog Pravilnika.
- (4) U skladu s kriterijima iz st. (3) ovog člana, kao i sljedećih međusobno povezanih kriterija; (i) obim i kapacitet resurse koji su stavljeni na razlaganja pronalazaču, (ii) stimulacija pronalazaka i pronalazača, te (iii) složenost procesa kreiranje pronalaska, raspodjela dobiti od komercijalizacije se vrši na sljedeći način:

	Inovacijski fond Univerziteta	Matična organizaciona jedinica stvaraoča	Stvaraoc
Za pronalaskes iz čl. 4.	20%	50%	30%
Za industrijski dizajn iz čl. 5.	20%	45%	35%
Za autorska djela iz čl. 6.	20%	35%	45%
Za predmeti zaštite pravima srodnim autorskom pravu iz čl. 7.	20%	35%	45%
Za biljne sorte iz čl. 8.	20%	50%	30%
Za topografije iz čl. 9.	20%	45%	35%
Za oznake koje se mogu zaštititi žigom iz čl. 10.	20%	60%	20%

Za know-how iz čl. 11.	20%	80% matična OJ i stvaraoc (posebnim ugovorom se utvrđuje odnos između matične OJ i pronalazača za know-how u skladu sa sadržajem i korištenim resursima organizacione jedinice)
------------------------	-----	---

- (5) Ako je intelektualno dobro, čija je komercijalizacija rezultirala u dobiti iz st. (3) ovog člana nastalo saradnjom više stvaralaca, tada im pripada udio u dobiti iz st. (4) ovog člana srazmjern njihovom stvarnom doprinosu u stvaranju intelektualnog dobra.
- (6) Raspodjela dobiti od komercijalizacije iz st. (4) ovog člana se odnosi na prihode od komercijalizacije intelektualnih dobara/intelektualnog vlasništva do visine do 500.000,00 KM. Za intelektualna dobra čija komercijalizacije prelazi navedeni iznos, raspodjela dobiti se, na prijedlog Komisije za intelektualno vlasništvo, utvrđuje posebnom odlukom Upravnog odbora Univerziteta.
- (7) Stvaraoc se može odreći svoga udjela iz stava (4) ovog člana pisanom Izjavom.
- (8) Odlukom Vijeća organizacione jedinice, matična organizaciona jedinica pronalazača može umanjiti svoj udio u raspodjeli dobiti od komercijalizacije intelektualnih dobara/intelektualnog vlasništva u korist pronalazača.

Član 19.

(Inovacijski fond Univerziteta)

- (1) Za potrebe razvoja, komercijalizacije i promocije intelektualnih dobara Univerziteta u Sarajevu, ovim pravilnikom uspostavlja se namjenski Inovacijski fond Univerziteta (u daljem tekstu Fond).
- (2) Prihodi Fonda predstavljaju sredstva po osnovu komercijalizacije intelektualnih dobara, odnosno intelektualnog vlasništva u skladu s odredbama ovog Pravilnika i ugovora, kao i prihodi koje Univerzitet zaključuje sa trećim licima.
- (3) Sredstva Fonda namijenjena su za promociju i podsticanje naučnoistraživačkog/umjetničkoistraživačkog rada na Univerzitetu, unapređenje rada Ureda i pokriće troškova vezanih za postupke pravne zaštite intelektualnih dobara pravima intelektualnog vlasništva, te troškove komercijalizacije.
- (4) Fond može ostvariti prihode i iz drugih izvora u skladu sa zakonom i statutom.
- (5) Sredstvima Fonda raspolaže Rektor Univerziteta.

DIO V - PRELAZNE I ZAVRŠNE ODREDBE

Član 20.

(Poslovna tajna)

- (1) Stvaraoci intelektualnih dobara, koji su predmet Prijave iz čl. 15 ovog Pravilnika, dužni su podatke o tim dobrima čuvati kao poslovnu tajnu prije podnošenje Prijave. Obaveza čuvanja tih podataka kao poslovne tajne može se produžiti za određena intelektualna dobra i na period nakon podnošenja Prijave, ukoliko Ured ocijeni, da bi u suprotnom moglo biti ugrožena zaštita ili komercijalizacija tog intelektualnog dobra, o čemu će stvaraoc biti blagovremeno informisan pismenim putem.

- (2) Sva lica, koja na bilo koji način učestvuju u poslovima prijave, procjene, zaštite i komercijalizacije intelektualnih dobara, te drugim poslovima utvrđenim ovim Pravilnikom, dužna su podatke o intelektualnom dobru, koje je predmet Prijave i z čl. 15 i s tim povezane podatke čuvati kao poslovnu tajnu, o čemu su dužne potpisati Izjavu o povjerljivosti, čiji obrazac utvrđuje Ured.

Član 21.

(Ostala pitanja)

- (1) Pitanja koja nisu regulisana ovim Pravilnikom, a koja se odnose na rad Ureda, biće uređena Poslovnikom o radu Ureda.
- (2) Ured je dužan u roku od 60 dana, od stupanja na snagu ovog Pravilnika, donijeti Poslovnik o radu, te utvrditi formu i sadržaj obrazaca i ugovora za prijavu, procjenu, zaštitu i komercijalizaciju intelektualnih dobara.

Član 22.

(Tumačenje)

Senat Univerziteta u Sarajevu je nadležan za tumačenje odredbi ovog Pravilnika.

Član 23.

(Izmjene i dopune)

Izmjene i dopune ovog Pravilnika se donose u postupku za donošenje pravilnika.

Član 24.

(Prestanak važenja Pravilnika)

Datumom stupanja na snagu ovog Pravilnika prestaju važiti pravilnici kojima je uređeno ovo pitanje na nivou organizacionih jedinica.

Član 25.

(Nadzor nad provedbom Pravilnika)

Nadzor nad provedbom ovog Pravilnika provodi rektor/dekan/direktor.

Član 26.

(Stupanje na snagu)

Ovaj Pravilnik stupa na snagu danom njegovog donošenja i objavit će se na web stranici Univerziteta.

REKTOR

Prof. dr. Rifat Škrijelj



Broj: 01-7-79-1/22

Sarajevo 25. 05. 2022. godine